

禮
記
章
句

禮記章句卷十六

船山遺書十三

衡陽王夫之撰

大傳

禘以上治而統祖宗以下治而統族二者相爲表裏皆禮之大者也此篇發明其義故謂之大傳抑考禘祀之禮昉於虞而備於周宗子之法殷惟有小宗而周立大宗蓋周先王以親親爲政教之本仁至義盡其道尙矣子曰吾從周而子貢謂仲尼之學爲文武之道職謂此也自周之亾秦蔑典禮禘祀不行而宗法廢漢氏以後雖有欲修明之者而得姓所繇莫可稽考故或依附失

實抑或懲其妄而姑已之惟宗之亾而致禘不可行然
後知先王肇修人紀之意至深遠也程子汲汲於宗子
之法而欲復之蓋亦爲人道憂也族譜之修祠堂之設
庶幾得其遺意而爲興復之本宋之君臣不爲小補口
□□□□□□□□□□□□可慨矣夫凡六章

禮不主不禘王者禘其祖之所自出以其祖配之

禘之爲言諦也所以諦審淵源而大報本始也祫以祀
受命之祖天子諸侯之達禮而天子復推崇及遠祀其
所自出之帝於太祖之廟爲西鄉之尊而太祖配之四
代所禘之帝詳見祭法

諸侯及其太祖

及至也謂禘祭也太祖者受命始封之君

大夫士有大事省於其君于禘及其高祖

大事謂非常之事如賜氏賜邑之類省告也于空也大
夫士不得立高祖之廟主已遷毀則空爲位於祖禰之
廟而禘之然必告君見許而後敢行且但及高祖而無
太祖大夫士不世官無始封之祖也不王不禘者所以
立義而定分禘達於士者所以推仁而逮下仁義之並
行而不悖也抑于禘止於高祖而王侯之禘及太祖則
大宗小宗之義亦寓於此矣

右第一章 此章言禘禘之制

牧之野武王之大事也既事而退柴於上帝祈於社設奠

於牧室遂率天下諸侯執豆籩遠奔走追王大王王賈父王

季季厯文王昌不以卑臨尊也追王之王子放反遠詩作駿私問反大他蓋反父方矩反

大事謂改建天命而奉神治人也退斂兵也祈當作宜

師行祭社也奠奠幣於行主也牧室作次舍於牧野奉

行主而修奠於室也柴宜奠皆以告成功也遂者繼事

之辭謂還周而修廟祀也遠疾也宗廟之事以疾爲敬

奔走助祭而有事也追王之禮周公成之而此云武王

者周公因武王之受命而終其事故功歸於武王也不

以卑臨尊者欲奉其廟享天下之奉不可以諸侯之卑臨之也此所謂上治祖禰也

上治祖禰尊尊也下治子孫親親也旁治昆弟合族以食

序以昭繆別之以禮義人道竭矣

繆與穆同莫六反別筆列反

下治子孫謂分封也旁治昆弟立大宗也食者合之於

廟中則有旅酬之禮又時燕之於宗子之家親疏貴賤

一以昭穆序之父子祖孫無或踰紊則是別之以禮義

也人道者立人之道一本之誼所以異於禽獸者也蓋

因尊尊親親而推其禮之所秩義之所宜以立大宗之

法然後上治下治之義雖在百世皆疏通而曲盡則人

之所以爲人者道畢修矣

右第二章 此章言敬宗之義原本尊祖承上章以起
下章同姓從宗之意

聖人南面而聽天下所且先者五民不與焉一曰治親二
曰報功三曰舉賢四曰使能五曰存愛五者一得於天下
民無不足無不贍者五者一物糝繆民莫得其死聖人南
面而治天下必自人道始矣糝與羊海反治直之反
糝篇夷反繆莫救反

聖人謂始有天下創制顯庸者聽治也且先者不違他
務之意民不與謂養民之事猶後也治親上治下治旁
治也存省也愛者所相親愛謂嬖黨也一得皆得也贍

有餘也五者得而親睦道行民勸以和各安其業則財足而用贍矣紕繆乖錯也薄道行爭奪起民不得其死矣五者爲政之本教而治親爲五者之首務故以人道始矣

立權度量考文章改正朔易服色殊徽號異器械別衣服此其所得與民變革者也其不可得變革者則有矣親親也尊尊也長長也男女有別此其不可得與民變革者也

別筆列反
長丁丈反

權秤度量尺量斗斛也文字之形聲音告令書疏之體也歲首曰正月首曰朔服色所尙之色徽旌旗號旗上

所書表識也器用器械戎器別衣服者尊卑冠服之等也尊親長幼男女之別人道之大者帝王治天下必此爲本故修明之而無所損益惟禘祀行而大宗正則合族以篤親奉宗子以定尊昭穆不紊以序長婚媾不通以厚別四者咸得而報功尊賢使能存愛之道皆繇此而推爾

右第三章 此章承上章而言人治之重以引起下三章之意

同姓從宗合族屬異姓主名洽際會名著而男女有別

反之

從宗從乎大宗也名姓氏也際交際會會合言昏姻之禮也姓氏著而昏姻以禮接乎異姓則男女之嫌別矣言周之宗法昏姻百世不通道之善也

其夫屬乎父道者妻皆母道也其夫屬乎子道者妻皆婦道也謂弟之妻婦者是嫂亦可謂之母乎名者人治之大者也可無慎乎

此儀禮喪服篇釋嫂叔不相爲服之文記者引之以申明主名治際會之義言男女之別必慎其名以杜亂源惟宗法修明同異有序而後昏姻之紀正也

四世而總服之窮也五世袒免殺同姓也六世親屬竭矣

其庶姓別於上而戚單於下昏姻可以通乎繫之以姓而弗別綴之以食而弗殊雖百世而昏姻不通者周道然也

免亡運反殺所界反
單都寒反繫古詣反

四世同高祖兄弟也袒免入哭則袒免退則無服也五世以上類爲同姓殺漸疏也六世則袒免之所不行相親相屬之道以遠而竭矣庶姓眾同姓也別於上謂小宗已遷也單亦竭也小宗已遷服屬已竭各立氏族故殷人許其昏姻之通而記者設問以辨之氏異而姓不失又爲合食於祭燕而序其昭穆大宗之法周監殷禮而損益之於是百世而昏姻不通使不昧於一本之義

斯以仁至義盡而爲人道計至深遠也

右第四章 釋上章大宗立而男女有別之義

服術有六一曰親親二曰尊尊三曰名四曰出入五曰長

幼六曰從服

長丁
丈反

術謂其輕重之方也名者世母叔母之類繫乎母之稱也出入謂女子在室嫁出反之別與舊君之類也長幼殤之別於成人也從者臣從君子從母之類也

從服有六有屬從有徒從有從有服而無服有從無服而有服有從重而輕有從輕而重

屬本相親屬也謂雖從宗親以服而已固與之有親屬

如子爲母黨之類徒但也本非與己爲親屬但從宗親而服之也如臣爲君之黨妻爲夫之君妾爲女君之黨妾子爲君母之黨之類從有服謂所從者有服餘放此從有服而無服如壻從妻爲妻之父母服而公子爲君所厭則不爲服及兄爲其妻齊衰期而弟於嫂無服之類從無服而有服如公子爲外兄弟爲君所厭不爲服而公子之妻從夫之本有服而服之及叔於嫂無服而叔之妻爲姒服之類從重而輕者女嫁爲其父母齊衰期而壻但爲之三月之類從輕而重者公子爲君厭自爲其母練冠而公子之妻爲齊衰期之類蓋從服者從

人而服而禮不失己尊卑疏戚固各有自盡之道不槩以人爲厚薄也

右第五章 此章言制服之義蓋亦尊親之推而與禘宗之意同原而出也

自仁率親等而上之至于祖名曰輕自義率祖順而下之至于禘名曰重一輕一重其義然也

上時掌反下胡駕反

率循也祖謂太祖仁主愛愛以遠而漸輕義主敬敬以尊而愈重推原一本之理一也而愛敬之情輕重之差出於自然則道異而竝行不悖矣仁以遠而漸輕故愛有所裁非天子不禘而廟有遷毀義以尊而愈重故敬

有常伸繼祖者爲大宗百世不遷繼禰者爲小宗五世而遷也

君有合族之道族人不得以其戚戚君位也

君爲太祖之嫡傳一族之正宗而以位故族人不得與講世序故立別子爲大宗之祖

庶子不祭明其宗也庶子不得爲長子三年不繼祖也爲子

爲反長
丁丈反

不祭者繼禰者不祭祖不繼禰者不祭禰也不爲長子三年不繼禰之庶子也

別子爲祖繼別爲宗繼禰者爲小宗

爲宗爲大宗也

有百世不遷之宗有五世則遷之宗百世不遷者別子之後也宗其繼別子之所自出者百世不遷者也宗其繼高祖者五世則遷者也尊祖故敬宗敬宗尊祖之義也

繼別子之所自出謂繼太祖也繼高祖者極小宗之終而言之實則小宗有四有繼禰之宗兄弟宗之繼祖之宗從兄弟宗之繼曾祖之宗再從兄弟宗之繼高祖之宗三從兄弟宗之過是則遷惟統於大宗耳敬宗者尊事宗子族人皆爲齊衰三月義者率祖而敬重也
有小宗而無大宗者有大宗而無小宗者有無宗亦莫之

宗者公子是也

無大宗謂不受統於大宗無小宗謂未立小宗無所宗也諸侯之子不敢繼先君以爲小宗世子承位亦不爲之宗又以公子故統於君而不受統於大宗至公孫乃受統焉惟諸侯有故而薨廢其子而立其弟則見廢之子得繼其禰而宗其父之爲君者如魯公子務人之類所謂有小宗而無大宗也其兄弟繼立以次傳於長兄之子則兄之子承其叔父之爲君者爲正統而叔父爲君者之子不得爲公子以繼先君而視公孫以受統於大宗若果餘祭夷昧之子之類是謂有大宗而無小宗

也無宗者謂不受統於大宗而君尊非其所宗也莫之
宗者羣庶子不相爲宗待其子而後繼己以爲小宗己
無宗道也此則公子之常也

公子有宗道公子之公爲其士大夫之庶者宗其士大夫
之適者公子之宗道也爲于僞反
適都歷反

有者不恆有之辭公子之公公子之兄爲君者也士大
夫公子而爲士大夫者也君命其同母之弟爲宗而羣
公子宗之蓋附別子爲祖之義亦後世之僭禮也

絕族無移服親者屬也移與施同
以鼓反

絕遠也謂五世以外之族兄弟也移漸及也四世兄弟

總五世祖免過此服不及焉則一本將同於路人其合之以明親者惟恃大宗之法爲之連屬則義重而仁亦不得不重矣

自仁率親等而上之至于祖自義率祖順而下之至于

是故人道親親也

同上音前

親亦禰也大宗之立尊祖以盡義而連合一本仁亦至焉立人之道曰仁與義於親親而備矣

親親故尊祖尊祖故敬宗敬宗故收族收族故宗廟嚴宗廟嚴故重社稷重社稷故愛百姓愛百姓故刑罰中刑罰中故庶民安庶民安故財用足財用足故百志成百志成

故禮俗刑禮俗刑然後樂詩云不顯不承無教於人斯此

之謂也

中步
仲反

收聚也宗子尊則族人親附也嚴尊也合子孫以事祖
考尊之至也志所欲爲也禮俗者上以禮齊民而民用
成俗也刑與型通謂有則而成也樂謂治定功成化行
俗美而樂以作盛治之至也不顯顯也不承承也言文
王能顯明先王仁義之德尊奉之於清廟而俾子孫各
以其世序仰承之則化行天下而無有厭教也
右第六章 此章言詳大宗之義而終之以清廟之詩
則宗與禘一致之理亦可見矣

禮記章句卷十六終

禮記章句卷十七

船山遺書十三

衡陽王夫之議

少儀

少詩
照反

此篇記少事長賤事貴之禮朱子所謂小學之支流餘
裔也與曲禮內則相為出入閒有互見者凡四十五章

開始見君子者辭曰某固願聞名於將命者不得階主見

馮反下同聞名
之聞亡運反

聞記者述其所傳聞之辭君子有齒爵之稱固誠也聞
名猶言通名階上進之意主王人也稱將命者以己卑
少不敢自進於主人也

敵者曰某固願見

敵者齒爵相當也得以階主不稱將命者矣

罕見曰闕名亟見曰朝夕誓曰聞名

闕亡運反亟去吏反

罕見久離而復相見也亟數也於尊者稱闕名敵者稱見其階主與否亦因其等誓則雖敵亦稱闕名以目無見辭不虛也

適有喪者曰比童子曰聽事適公卿之喪則曰聽役於司徒

適有喪謂弔也比者比次年力供喪事也童子不能任事聽使令也司徒有大喪則帥眾庶屬六引而治其政

令別無家司徒公卿之有司徒春秋以降之僭也弔而稱比役者哀不虛致必有事也

君將適他臣如致金玉貨貝於君則曰致馬資於有司敵

者曰贈從者

從疾用反

適他謂朝會貨泉布貝海中介蟲古者以其甲爲貨今雲南人猶然馬資謂芻秣之費敵者卿大夫之自相贈也

臣致襪於君則曰致廢衣於賈人敵者曰襪親者兄弟不

以襪進

賈居訝反

廢之爲言置也猶尊之有廢尊謂委致於地不以卽陳

也賈人玉府之屬吏主知物賈凡獻金玉文織貨賄者
玉府受而藏之物微不敢當玉府之藏稱其屬吏也親
者兄弟謂大功以上進執以將命也親者之禮自以卽
陳至親無文不將命也

臣爲君喪納貨貝於君則曰納甸於有司

爲于
爲反

納貨貝者賻也甸田也謂納其采邑之田賦也

右第一章 此章皆記將命之辭蓋少而習之以爲終
身之節

賻馬入廟門賻馬與其幣大白兵車不入廟門

知死者賻陳車馬以送葬也知生者賻賻助也助主人

之喪用也。廟門祖廟六門。殯朝於祖而贈馬入陳爲行飾也。賻之馬幣非爲死者不入陳也。大白革路所建之旗。兵車革路也。諸侯之葬。諸路皆駕鄰國得以贈焉。然兵車非容之盛者。雖贈亦不入廟。惟金路玉路象路則入革路不入。則木路亦可知矣。

賻者既致命坐委之。擯者舉之。主人無親受也。

謂賻幣也。委置於地也。舉受而藏之也。主人哀戚不在貨財。故賓不親授。主不親受。

右第二章 此章記賻賻之節。蓋因上章而次及之。受立授立不坐。性之直者則有之矣。

受立授立謂尊者方立而已與受授也坐跪也不坐者
重煩尊者俛也生質曰性直者謂龜胸不能俛者有之
謂或坐蓋受授雖不坐猶必俛躬承奉惟形質不能俛
者則嫌於稟岸雖坐可矣

右第三章

始入而辭曰辭矣卽席曰可矣

擯者辭也使賓主均齊中節無參差也

排闥說屣於戶內者一人而已矣有尊長在則否

說他法反長丁

反丈

排闥開戶扇向壁爲隱蔽以說屣也眾賓皆蔽猶必有

長故一人說屢於戶內示有所尊餘皆說於堂下若先有尊長在室則皆說於外無二尊也

右第四章

問品味曰子亟食於某乎問道藝曰子習於某乎子善於

某乎

亟去吏反

亟數也數食之則嗜可知不斥言嗜嫌從欲也道者教之綱藝六藝也道言習道不易善也藝必善而後謂之藝也不以能否爲問嫌量其短

右第五章

不疑在躬

疑質問也君子內省而察言觀色不以己之品詣為疑而問之嫌要譽也

不度民械度徒 離反

民人也械器物也不揣度人資生之器物而計其貧富嫌於伎求也

不願於大家

願歆羨大家富室也不樂道大家而歆羨之所貴者德爾

不訾重器訾將 此反

訾毀議重器宗廟之器也人之所世守而以奉先雖不

精好不當警也四者皆慎言之要

右第六章

汜埽曰埽埽席前曰拚拚席不以鬣執箕膺搗

汜字范反曰埽之埽

蘇老反餘先列反拚方問反搗與涉反

汜埽徧埽一室也拚與糞通除也鬣帚芒簇出如馬鬣
席前但以帚脊拂去餘食不使鬣端塵垢汚席也膺胸
也搗箕舌也執箕捐塵以舌內向不使或觸賓長

右第七章

不貳問

問卜筮也貳者雜以二事則黷神矣

問卜筮曰義與志與義則可問志則否與以諸反

問卜筮太卜問來卜筮者也可問為之卜筮也事或有須密者不能直告當質其為義為志若非義之志而不可顯言則其為逆慝可知不為之問以折姦且遠害也
右第八章

尊長於己踰等不敢問其年長丁丈反

尊以爵言長以分言年非其等者雖少不齒問年則嫌於齒之也

燕見不將命

亟見者一將命而止後此則為燕見將問道業不敢為

賓

遇於道見則面不請所之

見賢補反

見謂尊長見之趨前相覲曰面不見已則不面恐煩應接不請所之者尊長所事非所敢與也

喪俟事不植弔

他與特同

隨尊長而至喪者之家不敢為賓

侍坐弗使不執琴瑟不畫地手無容不嬰也

畫胡麥反俗讀胡化反者

非

使命之鼓琴瑟也畫地有所稱說而指畫也容張拱也不拱者以俟指使扶掖也嬰扇也

寢則坐而將命

尊長或有疾而寢將命必坐以俯就之

侍射則約矢侍投則攤矢勝則洗而以請客亦如之不角不擡馬

凡射二人爲耦先倚矢於楅二人更相讓拾取矢約矢者不拾取待尊長取四矢竟而後已總取之也投投壺也攤矢者尊長委矢於地更取而投之已則總四矢攤握以俟投也勝謂己勝也凡射與投不勝者自取醵立飲今與尊長爲耦而已勝不敢令其自飲洗爵以請若行觴然客云者謂非鄉射大射因燕而以射娛賓也亦

洗以請尊賓也角觥也所以示罰尊長不勝爵而不角不敢施罰也馬者投壺之算投壺之禮賓客各爲朋每耦勝則立一馬三馬而成勝遂行慶爵若一朋得二馬一朋得一馬則擢取一馬者之馬歸二者以成三馬卑少者與先生爲耦己朋雖得二馬不敢擢取先生之馬以受慶也

右第九章

執君之乘車則坐

執總握六轡頓馬而不行也乘車別於兵車之稱凡御者必立今以君未升車駐車而俟故坐而執轡不敢迫

君升也

僕者右帶劔負良綏申之面拖諸幣以散綏升執轡然後
步

僕御也右帶劔者凡帶劔於左便右抽之御者居中君
在左故右帶以避君也良綏君所執以升車者負者舉
而加諸左肩申之面者繞右腋出於前也幣覆芾席也
拖諸幣者委緒餘於幣便授君也散綏御所執者謂初
升時步行也御者既升執策分轡行車馬五步以調馬
乃駐而待君升也

右第十章

請見不請退

召而至事竟則請退若請見而更請退則進止皆自繇矣

朝廷曰退燕遊曰歸師役曰罷

朝直
逃反

朝廷以近君爲榮入爲進出爲退燕遊樂不可極以家爲主返爲歸也師役不得已之事以休罷爲幸罷者心力皆釋之辭君子之於言無所苟也蓋如此

侍坐於君子君子欠伸運笏澤劍首還屨問日之蚤莫雖

請退可也

還似宣反
莫漠故反

運轉弄之也澤摩拭之也劍首劍柄端環可也云者謂

雖請見不妨請退也

右第十一章 此章總記見君及尊長而退之通禮

事君者量而后入不入而后量凡乞假於人為人從事者

亦然然故上無怨而下遠罪也

為于偽反 遠于怨反

量而后入不輕仕也入而后量則菲薄其君而吝於忠

矣乞求也假借也量其許而後往也為人從事任人之

事不既任而量其不足與行持兩端也上謂己居人上

所乞假從事或己之卑幼也下謂事君而為臣

右第十二章

不窺密不旁狎不道舊故不戲色

道徒 到反

密謂僻處密語及所藏書疏也旁狎者對賓長而與侍
坐者相狎昵也道說也舊故往事也稱說昔所經歷以
形今之不然人所不信徒取憎厭也戲色戲見於色戲
之虐者也戒此四者以與人交然後人敬而悅之

右第十三章

爲人臣下者有諫而無訕有亡而無疾頌而無調諫而無
驕怠則張而相之廢則埽而更之謂之社稷之役

相息亮
反更古

行
反

下謂屬吏訕背譏也亡去也疾怨也巧言以頌曰譎氣
矜以諫曰驕君心荒惰曰怠張者勸令勤敏相助也法

度圯壤曰廢埽去弊也更興利也安君以安社稷而非
為容悅則為社稷役而非為君役也

右第十四章

毋拔來毋報往

拔蒲撥反
報芳邁反

拔報皆急疾之意來猶就也往猶去也君子之與人交
慎於始而不輕絕之不疾為向背也

毋瀆神

瀆猶辱也祭其所當祭而以時則不煩辱矣

毋循枉

循繇也循義以行不枉道以速獲也

毋測未至

未至之事聽理勢之所自至君子盡其常而先覺不以私意測度之

士依於德游於藝工依於法游於說

業
藝所以廣其德說所以精其法也非是不以之亂其恆

毋訾衣服成器毋身質言語

服器已成而訾毀之不及事而徒損也質證也聞言而不遽爲傳說可免於質矣莊子曰傳其常情無傳其溢言則幾乎全意亦近此

右第十五章 此章所言皆淺近之事而能慎乎此則亦脩身之切務學者不可以其易而忽之也

言語之美穆穆皇皇朝廷之美濟濟翔翔祭祀之美齊齊皇皇車馬之美匪匪翼翼鸞和之美肅肅雝雝

濟子禮反 匪與驛同

芳微反

言語辭命也穆穆旨意深遠皇皇辭氣昌大也濟濟出入均齊翔翔容止各得貌齊齊整肅皇皇敏也車馬謂戎車美御之善也匪匪行不止貌翼翼輕捷貌鸞和謂乘車行有節則鸞和之聲調肅肅清也雝雝和也

右第十六章

問國君之子長幼長則曰能從社稷之事矣幼則曰能御
未能御問大夫之子長幼長則曰能從樂人之事矣幼則
曰能正於樂人未能正於樂人問士之子長幼長則曰能
耕矣幼則曰能負薪未能負薪長丁
丈反

此與曲禮所記小異皆使者對客之辭也未能其尤幼
者也御侍也謂待君也樂人大司樂教國子也從事藝
已成而可試於用也正就正初入學也

右第十七章

執玉執龜筮不趨堂上不趨城上不趨筮楚
革反

城上趨則惑眾

武車不式介者不拜

武車兵車介冑之士肅擡而已

右第十八章

婦人吉事雖有君賜肅拜爲尸坐則不手拜肅拜爲喪主

則不手拜

雖本惟字之誤

吉事周禮所謂吉拜也拜而後稽顙謂之吉拜齊衰不杖期以下拜賓則然以別於三年服之凶拜也異於男子者男子頓首而後稽顙也肅拜若今揖然低頭下手而不及地婦人以肅拜爲正惟於疏喪而拜君賜則然爲尸爲祖姑之尸也手拜周禮所謂空首拜而頭至手

也婦人以手拜爲重尸道尊故但肅拜爲喪主爲主婦
也不手拜者稽顙而後拜其拜也亦頓首而不空首哀
至無容也

葛經而麻帶

婦人卒哭之後易首經以葛而要不變婦人重要有除
無變

右第十九章 按此章記婦人之禮而繫之少儀者婦
人行禮亦男子爲之詔相學禮者所當習也

取俎進俎不坐

取俎者俎陳於阼階西取而執之以升也進俎設於席

前也設俎在降神之先未接神不虛敬也

右第二十章

執虛如執盈入虛如有人

執虛虛器也入虛虛室也誠愨端慎之心盡於己而不因於物乃學者存心主敬之要也

右第二十一章

凡祭於室中堂上無跣燕則有之

室中饋食之事堂上朝踐之事跣脫屨也屨賤不升於堂故升堂則跣祭者將事奔走務於敬敏不可以跣故雖升堂入室不脫屨也惟燕禮獻酬畢留賓飲酒則脫

屨升席曰有之者謂如獻酬時亦無踐也

右第二十二章

未嘗不食新

嘗薦新於寢廟也人子之心不忍先親也

右第二十三章

僕於君子君子升下則投綬始乘則式君子下行然後還

立還似宜反

君子兼君卿大夫而言非僕者之敵也升下或升或下

也投者以手持而引之也僕升在君子之先故始乘必

式以徹俟之下在君子之後待君子之步行然後下還

向外待君子去遠乃驅車而退

乘貳車則式佐車則否貳車者諸侯七乘上大夫五乘下

大夫三乘

乘貳之乘如字餘繩證反

朝祀之副車曰貳戎獵之副車曰佐凡副車皆令人攝乘之兵車不式故乘佐車不式也其式者以非己所得乘必恭敬以明有奉也周禮貳車公九乘侯伯七子男五此言七者舉其中而言之上大夫者天子之卿下大夫者天子之大夫凡貳車皆如其命數卿當六乘大夫當四乘此言五言三舊說以為殷制蓋降殺以兩之義也

有貳車者之乘馬服車不齒觀君子之衣服服劔乘馬弗

賈

賈居
誦反

有貳車者謂大夫以上尊者也乘馬服車謂其馬方服
車時也服劔所佩劔也弗賈者不敢評其良楛

右第二十四章

其以乘壺酒束脩一犬賜人若獻人則陳酒執脩以將命

亦曰乘壺酒束脩一犬

乘繩
證反

乘四也犬賤不升堂故陳酒執脯而將命必舉其全也
凡獻賜物多而所執者一皆放此獨言此者蓋古以此
三者為饋贈之恆儀而通用之

其以鼎肉則執以將命其禽加於一雙則執一雙以將命委其餘犬則執緹守犬田犬則授擯者既受乃問犬名牛則執紉馬則執鞞皆右之臣則左之守舒反

鼎肉牲體已解可升於鼎者委置堂下也犬名守田之犬為之名以便喉使紉牽牛繩鞞馬韉也臣俘虜左之者空右手以防制之

車則說綏執以將命甲若有以前之則執以將命無以前之則袒說他活反奉奉扶隴反

說解也前之謂以他物輕易持者先甲也袒裼露也

冑纁

器則執蓋弓則以左手屈謂執拊劍則啓櫝蓋襲之加夫

襖與劍焉拊扶兩反
夫防無反

器之有蓋者必重故執蓋將命使其輕也韜弓衣屈韜者襖露其半屈於拊際拊與引同也左握拊右執末露之簫楛凶器者逆執之遠姦賊也櫝劍匣襲之者反蓋積於下也夫語助辭襖劍衣與猶於也以衣覆劍亦慎凶器也

笏書脩苞苴弓茵席枕几穎杖琴瑟戈有刃者櫝筴籥其執之皆尙左手苴子
余反

脩脯脩苞苴編束菅葦以裹魚肉也茵褥也穎籥也穎

杖杖下有鐙者戈有刃者別於斧之無刃之辭橫篋也
筴以兩薄木旁夾之也籥以圓竹筒韜之也自笏以下
十二物或用楨或用筴或用籥護之以示珍重戈則慎
凶器也尙左手者左手在前向客示非己用也

刀卻刃授穎削授拊凡有刺刃者以授人則辟刃反刺七逆

亦反

卻向後也穎刀鑿削書刀拊柄也辟退也退刃於後不
以鄉人遠凶害也

右第二十五章

乘兵車出先刃人後刃

出以致武於外人不以刃鄉國遠驚忌也

軍尚左卒尚右

軍之將尊司一軍之進退以吉禮處之而尚左正尊卑也卒之長卑聽命效死尚右用凶禮也

右第二十六章

賓客主恭祭祀主敬喪事主哀會同主詡軍旅思險隱情以虞

互相爲敬曰恭專致其恭曰敬詡張也盛也張國威而盛容儀也思險者以敗爲慮則不可得而敗矣隱祕也虞度也內度進止祕而不洩敵不得而窺也

右第二十七章

燕侍食於君子則先飯而後已毋放飯毋流歎小飯而亟

之數噍毋為口容

飯扶曉反亟去吏反數所角反噍與噉同才笑反

燕侍食待君子燕居之食也先飯後已以勸食也小少

也亟數也小飯亟噍防噦噎便問荅也口容者畜飯頰

閒弄頤而噍也

客自徹辭焉則止

客卑少則自徹然辭則可止不虛主惠也

客爵居左其飲居右介爵酢爵僕爵皆居右

僕讎倫反

客爵酬爵也所以優賓賓不舉則奠於薦之左飲獻爵

及舉觶也居右者便於舉也僕卿大夫來觀禮者介僕
之獻酬及賓酢主人之爵俱居右者以飲故也此言僕
者以鄉飲酒言之然舉一節而凡爲獻酢酬者皆放此
羞濡魚者進尾冬右腴夏右鱠祭臠臠荒
烏反

此常燕食設魚之禮羞亦進也濡鮮烹和汁也進前也
謂鄉客也不以首向客避憎憐也腴腹肉鱠脊也冬肥
在腴夏肥在鱠右之便先食也臠腹肉可擗大臠者乾
魚則必割擗登俎故不言進與右也

凡齊執之以右居之於左

齊才
細反

齊調和成味所謂羹齊飲齊食齊也進之者右手握持

之左手奉而居之於掌以致慎也

贊幣自左詔辭自右

贊助也擯者助主人受幣而入則繇主人之左旋而主人在左矣詔辭傳命而出則繇主人之右主人固在左吉禮以左為尊

右第二十八章

酌尸之僕如君之僕其在車則左執轡右受爵祭左右軌

范乃飲

帆扶泛反字从車夂凡俗本作軌者誤

酌僕者車將行犯軌酌以授僕使祭而飲也軌車前橫

木范字衍文蓋傳書者註帆音於下後人相誤沿以為

經文君之尸迎之以路車故禮與君同

右第二十九章

凡羞有俎者則於俎內祭

羞謂所進食也俎長實之末盈故於其端祭豆蓬之屬則祭之於外閒

右第三十章

君子不食圉腴

圉與黍同胡損反

、圉穀食之獸犬豕是也腴腹下肉肉以附骨者為貴腴賤不登君子之俎

右第三十一章

小子走而不趨舉爵則坐祭立飲

長者趨則已走以敏為敬也或賜之爵坐祭以習禮立飲以昭敬

右第三十二章

凡洗必盥

洗洗爵盥盥手先自潔然後能潔物

右第三十三章

牛羊之肺離而不提心離力知反
提都禮反

謂祭肺離割斷也提至也心中央也離割絕之猶留中央少許不斷手絕以祭

右第三十四章

凡羞有清者不以齊齊才
細反

羞殺也清汁齊醢醬也有清則已調和更納醢醬中染之則濡汚其齊矣

右第三十五章

為君子擇蔥薤則絕其本末為子悅反

蔥薤辛菜古人蓋生啖之如果茹今北方人猶然擇揀而進之也本根鬚也末葉端也皆不中食恐勞尊者更自絕故絕之以進

羞首者進喙祭耳

進鄉客也進隊者遠殺處耳易絕故以祭

右第三十六章

尊者以酌者之左爲上尊

尊者設尊也酌者之左於尊爲右上尊元酒也如鄉飲酒尊南鄉酌者北面則上尊在西是已惟君面尊尊東西列酌者西面則元酒在南酒之鄉生乎酌故以酌者之左爲尙且右便有事而左爲虛位故次尊在右便於酌也

尊壺者而其鼻

尊壺謂以壺爲尊也君燕則有方壺以酌大夫圓壺以

酌士鼻旁紐也。以鼻識其面，則鄉背明矣。

右第三十七章

飲酒者，醺者醺者，有折俎不坐。

飲酒非公燕而私相酌也。醺，沐已而飲也。醺酌始冠者也。折俎，或殺或乾肉折骨體以爲俎。禮之盛者也。飲酒，醺醺不備獻酬，皆無折俎，則坐而卒爵。惟人君飲醺及冠而殺者，於三加時或設禮。旣盛則雖無酬酢，必坐祭而立飲也。

未步爵不嘗羞。

步行也。謂獻酬畢，脫屣升坐，行無算爵也。獻酬之際，設

折俎以致敬祭之齊之而不食無算爵行乃薦庶羞以致愛始食之不褻人之敬而不虛其愛也

右第三十八章

牛與羊魚之腥聶而切之為膾麋鹿為菹豕為軒皆聶而不切麋為辟雞兔為宛脾皆聶而切之切蔥若薤實之醢以柔之軒許健反辟必益反

腥生肉也聶薄切之為片所謂藿葉切也切更加細切也內則魚亦為菹按魚易斷不待更切當從內則

右第三十九章

其有折俎者取祭反之不坐燔亦如之尸則坐

折俎有祭肺絕其末以祭而齎其本齎已反之於俎反必與者重盛禮敬荅主人也燔炙肉亞獻所薦也禮亦重故亦如祭肺三獻從以肝則殺其禮矣尸反俎不與尸尊也

右第四十章

衣服在躬而不知其名爲罔

名升數多寡染色淺深制度差等之名君子之服躬者必信諸其心無微之或苟也

右第四十一章

其未有燭而後至者則以在者告道誓亦然

道徒

其猶如也道相也

凡飲酒為獻主者執燭抱燋客作而辭然後以授人燋側角反

飲酒燕禮畢而行無算爵也主人謂之獻主者包君燕

臣而言宰為獻主也燋未燕燭所以繼者也

執燭不讓不辭不歌

辭相問荅也執燭者須壹於所事謹燄燋之灼墜

右第四十二章

洗盥執食飲者勿氣有問焉則辟呬而對辟呬義反

洗盥謂為尊者沃水洗爵盥手也勿氣屏口氣也辟呬

側口不向洗匱食器也

右第四十三章

為人祭曰致福為己祭而致膳於君子曰膳附練曰告

反偽

皆致胙辭也為人祭攝主祭也致福者致主人之神惠
己祭不敢言福備膳羞而已附練凶事不言福惟告成

事

凡膳告於君子主人展之以授使者于阼階之南南面再
拜稽首送反命主人又再拜稽首其禮大半則以牛左肩
臂臠折九箇少牢則以羊左肩七箇牲豕則以豕左肩五

箇使疏吏反大他蓋反少詩
照反臠奴報反牲與特同

膳吉祭肉告耐練祭肉展省視阼階南者下階而拜於
堂下也臂肩下骨臠臂下近蹄骨折割折之繇肩至臠
斫爲九段而不殊絕用左者右以祭也羊豕不言臂臠
文略耳此大夫士致胙於君而有太牢者大夫虞用大
牢也

右第四十四章

國家靡敝則車不雕幾甲不組滕食器不刻鏤君子不履

絲履馬不常秣靡忙皮反
幾渠希反

靡謂財物糜散敝謂人民凋敝雕畫也幾當附纏處疏
刻爲沂鄂也滕緣也組滕以組緣飾之也鏤刻令通透

也不履絲屨冬皮夏葛以喪禮處之也君子救貧以儉
小人救貧以貪

右第四十五章

禮記章句卷十七終